

四庫全書

史部

欽定四庫全書

史部

欽定八旗通志卷

一百六十五至  
一百六十六

欽定四庫全書

欽定八旗通志卷一百六十五

人物志四十五

大臣傳三十一

滿洲正紅旗二  
能圖 果斯海

道喇 沃申  
莫洛 希佛

朋春 穆誠額  
覺羅華顯

噶爾漢

傑殷

吉勒塔布

道喇

道喇滿洲正紅旗人姓輝和葉克舒長子也以護

軍從征伐積功授護軍叅領崇德三年

太宗文皇帝命貝勒岳託率師征明攻邊城道喇領兵先登克之五年從大軍圍錦州敵兵自松山來犯正黃旗營道喇護軍四十人擊敗其衆敵復來攻正紅旗汎又敗之會多羅特部蒙古蘓班代來歸道喇率兵取其家屬於杏山西五里臺遇明杏山騎兵復擊却之

世祖章皇帝順治元年調前鋒叅領隨大軍擊流賊李自成與前鋒統領鄂碩敗賊將唐通兵於一片石既

入山海關追賊至安肅又敗之復誘賊迎戰敗其  
兵於望都乘勝躡擊斬殺甚衆尋都統葉臣征山  
西師抵汾州同前鋒叅領圖爾賽破賊將白輝兵  
叙功授騎都尉世職三年賊將李錦集衆據荊州  
道喇隨順承郡王勒克德渾進勦賊衆潰走五年  
隨都統譚泰征江西叛鎮金聲桓五敗賊兵生擒  
偽總兵及叅將遊擊三人七年隨睿親王多爾袞  
敗於中後所以行列不整議罪輸罰鍰九年擢正

紅旗副都統十年潮州總兵郝尚久叛道喇奉

命同靖南將軍哈哈木率師討之復潮州尋統兵駐防荊  
州十四年授本旗蒙古都統十六年隨信郡王多  
尼平雲南明桂王朱由榔奔緬甸沅江土司那嵩  
應由榔據城叛道喇與前鋒統領白爾赫圖等攻  
克其城屢遇

恩詔復歷叙前功晉世職一等輕車都尉康熙二年以年老  
乞致仕徙居

盛京

詔許之十二年

聖祖仁皇帝念其効力年久勤勞素著

特加太子少傅二十一年

駕幸盛京

召見

賜坐賜酒並

優賚之明年九月卒年八十有一

賜祭葬謚勤襄立碑墓道以弟之孫伊濟納襲

沃申

沃申滿洲正紅旗人姓鈕祜祿崇德五年以前鋒  
從大兵征明圍錦州克松山順治元年隨睿親王  
多爾袞入山海關破賊李自成於保定復隨都統  
葉臣徇下直隸諸郡進征山西四年隨將軍哈哈  
木征陝西擊賊帥王雲祥於蒲城縣先登九年以  
功授騎都尉世職



賜號巴圖魯十二年補叅領十三年隨寧海大將軍伊爾德  
征舟山累敗偽總制陳六御等十四年叙功加一  
雲騎尉康熙元年授協領十三年六月擢杭州副  
都統以逆藩耿精忠叛浙東告警總督李之芳令  
沃申同副都統雅達里石調聲固守衢州尋調守  
金華府七月耿逆偽都督閻標自溫處來犯沃申  
擊其先鋒徐君美敗之復逼府城迎擊大敗之生  
擒標斬獲無算十月偽都督葉鍾犯浦江縣沃申

城守令都司陳夢陽由蘭谿迎擊追至石塘園斬  
偽將金春焚其壘而還時凌霞諸土寇從賊受偽  
職聚衆滋擾沃申同調聲勦之斬千餘級潰其衆  
尋奉康親王傑書檄往會貝子傅拉塔勦台州賊  
行至義烏縣遇偽都督趙明卿迎戰擊走之十四  
年二月同副都統伯穆赫林攻取仙居縣經白水  
洋偽將林冲陳啓秀率萬餘衆連營十三來拒沃  
申分兵二隊隊各分左右翼令營總薩木哈領頭

隊當賊左六營令侍衛卦塔領二隊當賊右七營  
戰移時賊不退沃申直前擊之連破二營乘勢追  
斬三千餘時偽都督朱富屯太平縣聞我兵至復  
從叛鎮曾養性乞兵守招之不降沃申伏兵城西  
而以雲梯攻其東南北三面賊果開西門遁伏  
兵起擒富盡勦城內餘黨進屯仙居縣會台州賊  
拒險我兵隔江不能攻聞仙居有路通黃岩可襲  
賊後傳拉塔令沃申鑿石伐木夜步進八月師次

半山嶺偽都督劉邦仁率賊分兩路來沃申身先  
士卒大破之進次梁蓬隘口復擊斬偽將王仲祿  
等降偽官二十餘兵民三萬六千餘養性及偽將  
軍祖宏勲遁福建十五年三月養性等糾瑞安石  
塘賊分八路來犯沃申同副都統吉勒塔布先後  
擊敗之斬偽都督孫可得等殲賊二萬五月傳拉  
塔奉

詔由處州進征福建沃申從八月耿逆遣其將連登雲據浦城縣

之石塘阻我入閩兵沃申同副將陳世凱擊之連  
破九營進復雲和縣會康親王大兵已拔江山常  
山等縣復建寧延平二府耿精忠詣軍門降招回  
養性宏勲王令沃申同穆赫林守延平十二月海  
賊鄭錦遣偽都督吳淑取邵武尋犯延平營木城  
於新屯渡別遣其弟潛據浦塘隘口沃申率守兵  
擊敗潛乘勝渡河攻木城賊潰追之遇偽將楊德  
來援又敗之小河岸斬首萬餘生擒偽總兵阮信

降偽將彭世勲等邵武汀州相繼復海寇聞風竄  
泰寧建寧寧化長汀清流歸化連城諸偽官相率  
迎降會賊首朱寅寇泉州為官兵所敗遁入海中  
石井寨十六年十月我兵分三路進剿沃申同副  
都統孟安由東路遇賊將何祐以舟屯清寺別營  
江西岸塔岡山拒我師沃申等擊破其營克清寺  
十七年九月沃申援漳州大敗賊於龍虎山斬偽  
將鄭英吳潛等賊棄寨登船據江東橋十一月復

同浙江提督石調聲奪江東橋通漳泉路十八年  
十月賊遣偽都督林盛屯東石東石近泉州為金  
門廈門門戶寧海將軍喇哈達令沃申取之沃申  
造雲梯進次靈水東石三面皆海賊嬰城固守沃  
申精選前鋒架雲梯候潮落齊進親薄濠指揮遂  
拔之斬偽將林英生擒偽總兵陳深俘獲甚衆石  
井白沙諸賊皆望風遁燬其營十九年二月賊遣  
偽都督林深與我水師相拒復遣其將張志於大

定小定募水手梗我船道適泉州無船沃申奉喇  
哈達令從店頭陸路進至大定海岬乘潮退急擊  
奪賊中寨追至小定賊上船遁斬偽將陳飛龍等降  
其衆渡難民五千二百餘時官兵已復海澄沃申  
乘勝渡海取尾高溪與漳州兵夾攻廈門金門克  
之招降偽官三十餘賊遁出大洋六月康親王班  
師奏以沃申防守泉州二十一年追議沃申前在  
江山縣失守戰死者未收骸在金華違速取溫州



軍令在台州未能剿滅小梁山寇功不敵罪盡奪其職三十年五月卒

能圖

能圖滿洲正紅旗人姓納喇

世祖章皇帝順治元年任內院筆帖式譯遼金元三史書成

賜銀馬加員外郎銜二年四月改授宏文院侍讀八年三月遷宏文院學士九年正月充

太宗文皇帝實錄副總裁官初能圖以考滿授雲騎尉兩遇

恩詔晉職至三等輕車都尉至是

上以原任吏部尚書譚泰濫援

恩詔優加諸臣世職

命王大臣核議降能圖世職為騎都尉三月充

殿試讀卷官七月川湖總督羅繡錦奏湖南守將於

賊中搜獲偽刻平西王吳三桂通賊告諭

上命能圖赴四川軍營傳

旨慰諭三桂且以偽刻告諭示之還

命教習庶吉士十三年正月遷左副都御史加太子少保  
四月以考滿

賜羊酒廕一子入監十四年七月能圖以八旗世職自武  
功議叙外其考滿所得及

恩詔所加在順治七年以前概予承襲七年以後止及本

身請

勅部議畫一定例遵行與左副都御史魏喬介副都御史  
納都瑚等列銜入奏

上諭吏刑二部曰都察院乃耳目要職當以政治得失民  
生利病據實上聞凡事可行不可行尤當熟思妥確然  
後奏請世職應襲與否久經定例何得輒請更改其中  
豈無受托市恩情弊此係何人倡議受誰囑托務須訊  
明於是集院臣詰問能圖實首先倡議應盡革職任魏  
喬介等聽從列名降革有差得

旨能圖革去太子少保及騎都尉戴罪留副都御史任十

五年九月擢左都御史十六年三月

諭獎奉職勤勞諸臣加能圖太子太保六月

上以雲南新闢發帑金三十萬兩分賑貧民

命能圖同尚書伊圖學士麻勒吉往董其事尋奉

命同麻勒吉察奏大軍取永昌後貝勒尚善等縱兵擾民

狀為之辯釋十七年正月遷刑部尚書七月安親

王岳樂等覆勘尚善等縱兵入永昌城掠民婦女

事得實能圖麻勒吉並坐徇隱罷任尋卒於家

果斯海

果斯海姓納勒世居葉赫父阿拜

太祖高皇帝時來歸隸滿洲正紅旗

世祖章皇帝順治七年果斯海以工部筆帖式累遷員外郎尋擢工科給事中十八年疏請八旗於京城各門外設教場練習士馬得

旨允行又疏陳五事一輔政四大臣應定祿品與職任相

稱一督撫大吏應遴才委任無分漢軍漢人一軍  
政之黜陟宜公平一文武官品級宜畫一一要地  
城守軍器請停遣部臣巡察嚴責所司核報至步  
兵虛額應即充補亦令各專轄大臣造冊送部得  
旨所奏更定輔臣祿品一款不必議餘下所司議行

聖祖仁皇帝康熙七年果斯海疏言兵民服色僭濫及一  
切虛糜闕風化者請嚴行飭禁并請考核各佐領  
下戶口盈絀以定獎罰又請減省重複案牘以歸

簡要皆下所司議行九年遷內閣侍讀學士充纂  
修

王牒官轉太常寺少卿預纂

太祖

太宗聖訓十一年遷內閣學士充重修

太宗實錄副總裁官十四年擢兵部右侍郎旋轉左充

經筵講官十五年九月山東提督周卜世疏劾巡撫

達爾布徇庇屬員侵漁百姓達爾布疏劾周卜世



挾讐起釁請遣官質雷果斯海奉

命往勘達爾布達例脅衆建立生祠事實坐褫職十六年  
調倉場侍郎十七年正月擢左都御史疏請滿洲  
蒙古朝鮮人毋許賣與漢軍漢人八旗各佐領下  
出戶人毋許出本佐領外應著為禁令

詔從所請尋遷兵部尚書

特命兼理戶部事二十年二月調禮部尚書七月

詔曰刑部為民命所關必精明幹練始克勝任果斯海向

在兵部才能素著其以禮部尚書銜管刑部事二十一

年十二月卒

遣內大臣奠酒

賜祭葬如典禮謚文敏

莫洛

莫洛姓伊爾根覺羅世居呼訥赫曾祖溫察

太祖高皇帝時來歸後隸滿洲正紅旗

世祖章皇帝順治七年莫洛任刑部理事官尋改工部主

事系遷郎中

聖祖仁皇帝康熙六年擢副都御史七年出為山西陝西  
總督時陝西災旱頻仍平涼臨洮鞏昌西安延安  
鳳翔漢中七府及興安一州荒地逃丁額賦無徵  
者有司率令現存之戶均輸民甚苦之莫洛既至  
疏請豁免

上從所請八年輔政大臣鰲拜結黨專權獲罪法司以莫  
洛素附鰲拜請逮問

諭曰莫洛為鰲拜黨羽應逮問念其任事封疆釐剔加派  
火耗等弊姑從寬免罪仍留原任九年遇計典吏部遵  
例甄別各督撫功過以莫洛向曾植黨行私奏

聞得

旨革職西安士庶聞之相率哀籲懇留甘肅巡撫劉斗同  
提督張勇柏永馥總兵孫思克等奏言莫洛涖任  
以來清以持已正以率下如革耗羨整驛遞息詞  
訟練士卒清荒熟教樹畜興水利善政難以枚舉

乙留任以慰民望

上曰簡用督撫原欲綏輯地方愛養百姓莫洛既為民愛戴特順輿情免其處分供職如故未幾擢刑部尚書十

三年二月

上既分命王貝勒大臣等討逆藩吳三桂並

諭部臣曰吳逆煽亂滇黔四川從逆陝西為邊陲要地西控番回南通巴蜀幅員遼濶素號巖疆非特遣重臣假以便宜未易綏靖莫洛前任總督深得民心茲特授為

經略駐劄西安軍事悉聽調遣復加銜武英殿大學士  
仍以刑部尚書管兵部尚書事

賜之勅印莫洛至西安策遣諸軍進征五月

詔諭莫洛曰朕聞叛鎮鄭蛟麟乞降又聞克復朝天關喜

慰殊深頃賊蜂聚岳州值雨甚大兵難行稍俟晴霽即

水陸並進吳三桂果在澧州宜乘虛徑襲其後如克復

四川可取道汶水以定貴州或徑趨雲南其餘諸將集

議尋奏逆賊堅據保寧川地未能猝復容俟奏捷即行

相機進取併奏防禦關隘輓運軍食機宜

諭曰朝天關諸隘關係要害可於滿洲漢軍綠旗官兵內酌撥防守相為犄角護送糧艘不為無助至漢中雖已駐兵猶恐力單且朝天關之外尚有別路可通漢中倘我兵深入後奸宄竊發據守雞頭關諸隘亦屬可虞一切機宜其酌行之又保寧未能即復則我師益致勞頓輓運糧餉實為要務其源源接濟毋令匱乏六月疏報偽副將姚孟龍等繳劄投誠時賊衆負固竊據廣

元所屬百丈關莫洛既遣都統馬一寶將軍席卜  
臣赴漢中副都統科爾寬赴廣元又慮廣元兵寡  
不敵賊衆令副都統吳國正俟馬一寶至即移師  
助之七月

上命貝勒洞鄂偕貝子溫齊輔國公綽克托率貝子準達  
所部驍騎赴四川莫洛疏陳大兵久駐保寧與賊  
相持秦民運餉勞苦臣今親赴漢中酌量分路進  
剿貝勒洞鄂若率衆盡行慮致遲滯請



勅簡精銳先發速至西安

上念貝勒所部無多仍令貝子公等亦各率所部進發會  
西安將軍瓦爾喀奏川鎮王懷忠標兵因糧匱逃  
散請發餉增兵救援

諭莫洛曰大兵或仍圍守保寧或因糧運艱難暫還廣元  
其與將軍等酌之並

命寬王懷忠標兵罪速行撫納八月莫洛復疏述陝省兵  
單請增兵以資戰守

上以增兵必須增餉或不煩增兵或必議增兵或不必親  
行赴川令詳悉覆奏莫洛言增兵則秦中得以保  
固迨四川底定則糧餉有資而秦民亦得休息臣  
仍宜親統官兵進剿四川

上從之九月莫洛将由秦赴蜀請

勅總督周有德巡撫張德地暨科爾寬等固守朝天關廣  
元諸路轉運糗糧並請

勅將軍等拒守保寧以待兵至

諭曰軍機緩急莫洛自有確見可與將軍席卜臣前往廣  
元進取昭化總督周有德等於經略未到之先督趣糧  
米運送軍前又廣元兵少或令席卜臣先赴廣元秣馬  
以待或與經略同發俱令莫洛酌行十月偽將軍何德  
成等糾合潰衆分路自川來犯寧羗先立營於文  
廟山官兵夜襲賊營賊衆大敗遁回南山

上諭莫洛曰寧羗為大兵後路爾其速援庶幾有濟莫洛  
因賊已敗遁令提督王輔臣遣兵駐守寧羗十一

月貝勒貝子等大兵未至偽總兵彭時亨等復屯據七盤朝天諸關剽奪略陽糧艘廣元兵缺餉者兩月賊衆旋復窺伺陽平

上慮莫洛所統皆綠旗兵巴蜀山路險惡滿洲大兵若不  
相繼難于策應因

勅貝勒洞鄂等兼程而進會同經略進川是月莫洛遂帥兵由漢中赴蜀令提督王輔臣隨征先是莫洛甫至陝有

詔調陝西兵征湖南輔臣自請率兵赴荊州

上以調征湖南兵已有貝勒尚善貝子準達等統領因

命輔臣仍駐平涼聽莫洛調遣輔臣心怏怏至是莫洛調

之隨征輔臣遂懷叛志佯言部兵少請增撥莫洛

給以騎兵二千輔臣少之又以所給馬疲瘠不任

用為詞搖惑衆心遂謀作亂十二月莫洛行次寧

羌州駐營王輔臣標兵猝亂襲刼經略營莫洛率

兵射卻之甫定王輔臣忽率叛卒來犯礮矢齊發

莫洛被重創歿于軍二十二年十月

賜祭葬如典禮謚忠愍予世職騎都尉兼一雲騎尉以其

子常安襲

希佛

弟漢初罕

希佛滿洲正紅旗人姓他塔喇世居安楚拉庫路

祖羅屯

國初率八百戶來歸列五大臣編佐領父哈寧阿由  
護軍叅領隨征錦州松山大軍入山海關擊流賊

追至望都縣總叙前功授騎都尉世職卒子漢初  
罕襲從征蘇尼特部騰機思等陣亡贈三等輕車  
都尉弟班初罕襲遇

恩詔晉二等輕車都尉希佛班初罕兄初任二等護衛順  
治七年襲世職兩遇

恩詔晉一等輕車都尉兼一雲騎尉授護軍叅領康熙七  
年擢正黃旗蒙古副都統十二年逆藩吳三桂叛  
希佛隨大將軍順承郡王勒爾錦往湖廣剿禦十

三年陝西提督王輔臣叛于寧羗據平涼秦州

命希佛同雲南總督鄂善等率現駐襄陽蒙古兵移守興  
安漢中十四年三月貝勒洞鄂征隴州復關山進  
兵秦州希佛攻克東西二關十五年調守隴州十  
六年遷前鋒統領十七年閏三月

詔赴湖南駐守茶陵十一月隨簡親王喇布由衡州之安  
仁縣進征十八年正月希佛率兵攻衡州府夜半  
薄城下統署前鋒叅領戴屯等奪門入賊帥吳國



貴夏國相等驚遁復其城得

旨嘉獎下部議叙六月遷正紅旗滿洲都統時偽將軍馬承蔭以南寧降

上命希佛率所部兵赴廣西同鎮南將軍莽依圖自南寧進定雲南十九年五月馬承蔭復叛糾二萬衆迎戰于陶登希佛偕副都統馬世泰進擊之賊大敗遁追殪甚衆閏八月奏南寧兵缺馬大軍深入塗險遠恐誤軍機

上諭以柳州南寧桂林駐兵之馬通融給發並趣都統瑪  
竒送馬赴南寧時莽伊圖卒于軍以都統賚塔為  
征南大將軍十二月希佛隨賚塔至西隆州偽將  
軍何繼祖等據石門坎築城以拒二十年正月希  
佛偕瑪竒等率前隊履險進攻後軍繼進夾擊大  
敗之盡奪隘口翼日乘勝馳安籠所復其城降偽  
總兵陳義魁繼祖遁新城復糾偽將詹養等據黃  
草壩列象拒戰希佛領前鋒進勦自卯至未破賊

營二十二獲象馬器械無算二月抵曲靖復馬龍  
州等城並遣營總碩塔等馳勦嵩明州斬關入賊  
遁殲其衆遂會大軍圍雲南省城吳世璠偽將胡  
國柄劉玘龍等犯我軍希佛率前鋒奮擊陣斬國  
柄玘龍及偽總兵九人賊將馬寶胡國柱等聞雲  
南圍急由四川還救六月希佛同提督桑格迎剿  
馬寶于烏木山敗其衆馬寶姚安降于軍九月躡  
國柱于鶴慶麗江復蹙之于雲龍州國柱勢窮自

縊王緒李匡等自焚死餘賊悉降二十一年十一月擢西安將軍

諭曰陝西地方緊要因爾練習軍務特簡此任須加意操演毋騷擾百姓至漢中必選精兵戍守不得以疲弱者發往先是希佛隨征長沙失利部議革將軍及世職

上念希佛勞績甚多褫本身加級從寬留將軍任及伊父二等輕車都尉世職時川陝平定部議將西安撥守漢中之滿洲漢軍兵各一千名撤半仍留一千

名輪戍二十五年希佛以棧道通送勞苦䟽請併  
撤部議不准

上曰蕩平以來漢中駐防無益朕不忍使兵民交困其輪  
班戍守及永遠駐防俱着停止二十七年復調正紅旗  
蒙古都統二十九年噶爾丹擾塞外諸蒙古

上命裕親王福全征之希佛叅贊軍事破賊于烏蘭布通  
三十年以老乞休

上慰留之三十一一年四月調正紅旗滿洲都統並授建威

將軍統師駐右衛三十三年噶爾丹師內向將侵  
根敦戴青

命希佛率右衛兵同將軍費揚古赴圖拉禦賊尋疏請大  
同總兵康調元率綠旗兵三千同行並請派發察  
哈爾兵

上以綠旗兵多則馬更少且滿洲兵有八千所向無敵希  
佛遇事疑阻令仍駐防右衛三十四年兵部疏劾  
不收八旗撥送馬致糜錢糧革職三十八年卒

朋春

朋春滿洲正紅旗人姓棟鄂何和哩之四世孫也  
順治九年六月襲其父哲爾本一等公

聖祖仁皇帝康熙十五年

恩加太子太保授正紅旗蒙古副都統二十一年二月調  
本旗滿洲副都統八月

命同副都統郎坦率兵赴黑龍江時俄羅斯人來邊境者  
咸稱為羅刹朋春奉

諭曰羅刹犯我黑龍江邊境昔曾發兵進討未獲翦除近  
又侵入精奇哩江諸處恃雅克薩城為巢穴蔓延益甚  
爾等至達呼爾索倫遣人赴尼布楚諭以捕鹿之故因  
詳視陸路近遠沿黑龍江行圍徑薄雅克薩城下勘其  
居址形勢度羅刹斷不敢出戰如出戰姑勿交鋒但率  
衆引還朕別有區畫

賜御用裘服及弓矢以行十二月還奏羅刹久據雅克薩  
恃有木城若發兵三千携紅衣礮二十具即可攻



取陸行自興安嶺以往雖無險山而林木叢雜途徑窄隘冬雪之時沙結堅冰夏日遇雨泥深淤阻惟輕裝可行水程自雅克薩還至愛濤城於黑龍江順流行船僅須半月觀兩岸悉可繹挽若逆流行船約須三月較從陸倍期運糧餉礮具為便現有大船四十小船二十六宜增造小船五十餘

詔寧古塔將軍巴海副都統薩布素建木城于黑龍江呼瑪爾二處調所部兵一千五百往駐造船運礮二

十二年正月擢正紅旗蒙古都統三月調本旗滿洲都統二十四年正月

詔選福建投誠善用簾牌兵在八旗及安插山東山西河南者四百人付鑾儀使林興珠臺灣投誠左都督何祐轄領赴

盛京朋春統之進勦以副都統班達爾沙瑪拉護軍統領佟寶等及林興珠叅贊軍務師既行

上遣侍衛關保往黑龍江傳

諭曰兵凶器戰危事古人不得已而用之朕以仁治天下  
素不嗜殺爾其嚴諭將士毋違朕旨以我兵馬精強器  
械堅利羅刹勢不能敵必獻地歸誠爾時勿殺一人俾  
還故土宣朕柔遠至意五月師薄雅克薩遣人以書諭  
降不從軍其城南集戰船于城東南進紅衣礮于  
城北將夾攻之城下三面積柴為焚城狀城中大  
驚其頭目額里克舍窮蹙乞降乃宣

恩諭宥其罪額里克舍垂涕稽顙謝引六百餘人徙去毀

其城以願來歸者附之巴什里等四十五戶及前  
此掠往之索倫達呼爾百餘戶移內地安輯師旋  
紀功二十九年七月

上命裕親王福全為撫遠大將軍勦噶爾丹以朋春與都  
統蘇努等叅贊軍務蘇努率左翼朋春率右翼八  
月朔至烏蘭布通噶爾丹依山列陣右翼兵為河  
岸泥淖所阻左翼兵由山腰衝入大破之日暮收  
兵次日噶爾丹遣使矢誓請和以緩我師乘夜由

大磧山遁去十一月師旋部議王大臣調度乖方  
不追勦敗寇罪應革職任

上以此舉既擊走噶爾丹概從寬處分朋春降四級留任  
三十一年三月解都統任赴西路軍前管營隊三  
十五年正月仍復正紅旗蒙古都統

命為撫遠大將軍費揚古叅贊由西路勦噶爾丹五月破  
賊於昭莫多凱旋因本隊陣亡護軍驍騎十八人  
未收遺骸議罪以應叙昭莫多軍功抵免三十六

年七月彙叙西路出師奮勇勞績增注所襲一等公

勅書三十八年六月以疾解都統任四十年四月疾卒子增壽循例銷去

恩詔所加之爵改襲三等公四十一年九月授正紅旗漢軍副都統四十三年三月調鑲藍旗滿洲副都統五十一年罷任六十年卒子恒泰襲爵授散秩大臣

世宗憲皇帝雍正九年追封何和哩為勇勤公其世襲之三等公亦加號勇勤

穆誠額

孫阿斯海

穆誠額滿洲正紅旗人姓薩哈爾察世居綏哈

太祖高皇帝時烏拉有蘇庫努來歸其高祖也

世祖章皇帝順治十三年穆誠額以前鋒叅領隨寧海大將軍伊勒德征浙江舟山時偽英毅伯阮思偽總制陳六御等列戰艦二百餘抗拒海島穆誠額率

水師迎擊賊衆大敗旋署護軍統領隨定遠大將  
軍世子濟度征福建至則海賊鄭成功竊據閩安  
鎮散布賊衆於汀泉漳福諸屬泉州大營村聚賊  
千餘穆誠額偕營總瑪拉擊敗之斬賊渠李樑及  
其衆七百餘級復隨大兵擊敗偽提督黃常等於  
新湖灣福前所及魏陀白沙河等地十四年叙功  
予雲騎尉世職

聖祖仁皇帝康熙十五年穆誠額隨撫遠大將軍圖海至



陝西討叛鎮王輔臣師至平涼城北之虎山墩賊衆萬餘迎戰穆誠額隨前鋒統領穆占率兵奮擊大敗賊衆追殺十餘里收獲軍械馬匹無算二十三年擢授本旗蒙古副都統二十五年叙平涼戰功晉世職為騎都尉二十八年以老病致仕四十年卒

賜祭葬如例孫阿斯海襲世職雍正七年阿斯海以前鋒侍衛從征準噶爾九年準噶爾犯我北路軍營靖

遼大將軍富爾丹遣前鋒統領定壽等迎戰於庫  
列圖嶺賊據險要富爾丹令移營至和通呼爾哈  
諾爾賊遽衝突我師阿斯海力戰歿於軍

賜卹加一雲騎尉以其子書敏襲

噶爾漢

噶爾漢滿洲正紅旗人姓納喇兵部尚書噶達渾  
之子順治十四年襲父一等輕車都尉世職初為  
王府長史

聖祖仁皇帝康熙元年授正紅旗滿洲副都統八年授本旗蒙古都統十四年七月授鎮安將軍駐守河南

十月奉

詔移師襄陽禦勦叛鎮楊來嘉等十五年三月率兵擊敗

賊衆於南漳縣之靈機寨焚毀賊營賊衆遠遁四

月四川叛鎮譚宏糾衆由上津鄖西侵犯鄖陽以

巨艦數十逼城復據城東之陡嶺阻我糧道噶爾

漢同湖廣提督佟國瑤列營武陽洞前防禦復督

師由江中並南北兩岸三路進勦水陸齊擊賊衆  
披靡獲鎗礮器械甚多得

旨下部議叙作三等軍功十八年四月偽總兵謝泗劉魁  
等刦掠竹山竹谿等處盤踞山險近逼鄖城與興  
安諸賊聲勢聯絡

上命噶爾漢同總督楊茂勲等率兵撲滅乘機規復興安  
六月疏言鄖西山高路狹草木叢塞時多靈雨山  
水暴下師行阻滯前後不能相顧輓運亦難俟木

落水涸進征十一月

諭責噶爾漢不即規復興安下部嚴察銷去前功事定後  
議罪十九年十月疏報副都統塞格恢復巫山又  
報自巫山進取夔州賊奔潰並敗譚宏之兵於錯  
開峽二十年正月率兵敗賊衆於雲陽擒偽總兵  
向旭輝等恢復縣城譚宏已死其子譚天秘震懼  
焚巢遁萬縣開縣建始梁山忠州悉平得

旨嘉獎二十二年三月授荊州將軍四月議政大臣等議

噶爾漢于十七年二月聞楊來嘉賊衆在房縣不能救援例應革職籍沒有功可抵請革將軍免籍沒

上曰噶爾漢原因其人堪用簡授將軍着降五級仍留任  
二十七年六月湖廣裁兵夏逢龍作亂聚衆刦掠黃陂雲夢等縣噶爾漢自荊州赴安陸遣協領穆禮瑪等率兵進勦擒斬偽副將二偽守備三偽把總一賊衆復逼應城噶爾漢領兵擊退賊衆賊趨

武昌噶爾漢駐應城疏言糧餉不敷戰船未脩不能克期前進

上命調回為正紅旗蒙古都統以都統巴渾德代之別

遣振武將軍瓦岱統八旗兵往會提督徐治都等勦擒達  
龍磔于市十一月部議噶爾漢于武昌兵變時率  
兵進剿不即行撲滅藉稱糧餉不敷戰船未脩退  
縮不前應革職鞭責籍沒家產

詔從寬免其籍沒後卒于家

傑殷 弟傑都

傑殷滿洲正紅旗人其先世居朝鮮有韓明璉者  
任龜城府使與昌城總兵李适謀逐其國王李侗  
為他將所殺子潤與姪義脫走來歸

太祖高皇帝授官有差後並晉職一等輕車都尉傑殷義  
次子也初任一等待衛順治十六年授護軍叅領  
聖祖仁皇帝康熙八年擢正紅旗滿洲副都統十一年遷  
護軍統領十四年四月察哈爾布爾尼叛



命同內大臣佟國綱率兵鎮宣府五月察哈爾平

詔平逆將軍畢力克圖移師赴榆林會勦叛賊朱龍以傑

殷叅贊軍務六月師次謝村分兵三隊傑殷乘夜

先發黎明至河岸賊三千餘拒楊家店渡口我師

鳴角渡河擊潰賊衆翌日克吳堡縣遂趨綏德賊

據虎爾岸山口傑殷率兵仰攻射殪偽遊擊黃文

英餘賊敗竄追擒七十餘人獲馬匹器械進克卧

牛城遂復米脂延川等縣與署副都統覺和托分

兵攻延安傑殷領隊前進擒賊謀二斬之敗偽總  
兵李士英于宜川復延安城及諸屬縣宜川所屬  
二十六寨悉平八月會大軍剿叛賊王輔臣于平  
涼貝勒洞鄂令傑殷領左翼兵為前隊距城八里  
許賊萬餘列陣迎戰傑殷督兵衝其中堅自己至  
未挫賊者三復分兵四路環擊殲賊甚衆十月掘  
壕南山城内馬步賊兵出犯擊却之斬百餘級十  
二月賊黨蔡元自西山來犯傑殷同副都統鄂克

濟哈奮擊敗之破其壘十五年二月叛鎮吳之茂  
欲為王輔臣外援糾賊萬餘盤踞秦州城西南三  
十里鋪及附近諸堡洞鄂令傑殷移師禦剿敗賊  
于谷口山崖斬級五十餘與將軍佛尼勒提督王  
進寶會師秦州議繞賊壘後絕其糧運三月傑殷  
同副都統翁愛率兵先行遇賊二千餘出羅家堡  
抗拒陣斬二十餘級進趨鹽關擊斬護糧賊三百  
餘生擒偽官及兵三十餘人獲馬羸器械焚其餘

糧又乘夜由賊壘左趨牡丹圍賊以二千兵護糧  
趨三十里鋪傑殷督兵捕剿斬獲甚衆四月賊揚  
言斷關山道截臨鞏路傑殷移師伏羌遣兵敗賊  
于平頭山進圍馬塢攻破二寨斬賊千餘生擒四  
十三人焚賊糧三百餘袋偽總兵陳姓李姓等引  
賊萬餘陷通渭縣城傑殷率兵前進遇賊于十八  
盤山坡分左右翼擊敗之乘勝奪門復縣城賊四  
散奔逸追斬七百餘級獲駝馬器械無算還守秦

州截吳之茂通平涼路五月大將軍圖海下平涼  
檄諸將進兵吳之茂引賊遁傑殷同佛尼勒率兵  
乘夜追剿及之于牡丹園分兩翼夾擊自午至未  
屢破賊陣遂克祁山堡別有賊三千自西和縣北  
山迎戰敗之于紅山嘴及清陽峽又遂輕騎躡追  
至石牙兒關吳之茂率二十人越山遁餘賊潰  
散先後斬偽官及兵五千餘生擒五百餘人獲偽  
劄百五十有奇鎗礮馬羸器械無算禮縣西和俱

復賊帥王屏藩遁走階州窮追至小川子單家河  
招撫偽遊擊等五員兵三百餘留兵防守西河傑  
殷還駐秦州圖海以

聞得

旨嘉獎下部議叙十七年閏三月遣兵克扶風縣之潼關  
堡及午井黎虎諸寨十九年正月會師進保寧同  
佛尼勒覺和託等領軍奮擊大敗賊衆追勦三十  
里陣斬偽將十員兵三百獲偽劄五百餘馬匹器

械甚多進復順慶府所屬三州十一縣悉平尋卒  
于成都軍營

賜祭葬如例追叙前功予騎都尉世職以其子花色襲弟  
傑都順治十六年由護軍叅領隨安南將軍達素  
剿海賊鄭成功于廈門賊船六百餘倚踞澄浦嶼  
傑都領隊擊敗賊兵康熙十三年隨前鋒統領穆  
占剿四川叛賊吳之茂等由陝西進征擊敗偽總  
兵石存禮于朝天關遂趨保寧駐營蟠龍山賊帥

王屏藩引衆刦掠阻絕我餉運我軍退還傑都殿  
後力戰沒于陣

賜卹如例贈騎都尉加一雲騎尉無子以兄之子韓成襲  
世宗憲皇帝雍正二年以傑都入祀昭忠祠

吉勒塔布

吉勒塔布滿洲正紅旗人姓李佳副都統覺善第  
三子也初任侍衛兼前鋒叅領

聖祖仁皇帝康熙十一年擢正紅旗蒙古副都統十三年



逆藩耿精忠叛奉

命同副都統拉哈駐守江寧尋

命率師赴援浙江聽將軍拉哈達調遣及大將軍康親王傑

書統兵駐金華吉勒喀布隨寧海將軍貝子傅喇塔

進師台州至嵎縣偽都督曾養性偽總兵陳理等屯衆

於黃瑞山將犯天台以斷我糧道吉勒塔布遂乘夜馳

進分兩翼衝擊又遣兵循山麓疾上以鳥鎗旁擊之賊

大潰斬偽副將陳鵬偽叅將徐可先周標等進克仙居

縣十四年曾養性與叛鎮祖宏勲犯台州依山結寨  
吉勒塔布同副都統沃申自仙居襲賊後疾馳至半  
山嶺偽都督劉邦仁擁衆萬餘拒戰我兵嚴隊以進  
賊堅持弗退吉勒塔布率步兵奮擊賊大敗斬偽副  
將王仲祿叅將趙明燿賊四千餘進師梁蓬隘口賊  
衆掘壕塹以守我兵突進攻之奪其隘馳追道遇賊  
伏盡殲之直趨黃巖副都統穆赫林復自前路夾攻  
曾養性乘夜突圍遁温州大軍遂定黃巖吉勒塔

布率兵敗賊於上塘嶺進攻温州賊踞險死守我軍攻之弗下十五年三月曾養性糾合平陽瑞安賊衆并福建來援之賊四萬餘水陸來犯吉勒塔布分路迎擊賊以礮箭火礮焚我漢軍營又蟻聚山巔奪我紅衣礮吉勒塔布並率兵擊敗之時康親王統師由衢州征閩傅喇塔亦留兵圍温州偕吉勒塔布勦處州諸賊以入閩六月過三角嶺循江岸進兵曾養性等聯百餘艘於江屯賊衆於得

勝山下之古溪據險以扼我師吉勒塔布同總兵  
陳世凱分兩路斫賊營拔之又以礮擊賊艘沉江  
中賊潰走道乃通進師溫溪渡口偽都督馬成龍  
等率衆拒戰復督兵奮擊斬千餘級降賊將馬國維  
鄭雄等遂會康親王軍於衢州八月同都統耆塔  
等剿偽都督馬九玉攻賊大溪灘營偽總兵林福  
拒戰吉勒塔布擊敗之踰三濠進焚木城擒偽總  
兵副將等十二克江山縣馬九玉敗遁旋自江山

進兵峽口擊敗偽兵部閔可孝等降偽副將牟年  
義遂過仙霞嶺整師將攻闕偽副將王明庫等降  
聞馬九玉遁浦城又率兵馳追殲賊甚衆抵浦城  
擊賊大敗奪門入遂復其城九月同前鋒統領希  
佛等攻建陽縣賊墮水死者無算奪橋克城追賊  
至建寧府賊走延平十月隨康親王招撫延平進  
抵福州耿精忠降賊黨悉解散十六年六月擊海  
賊鄭錦於同安縣敗賊黨朱寅于三保谿降偽副

將黃邦漢十八年鄭錦偽總統劉國軒等由峪  
州太平寨來犯將斷江東橋以刼長泰吉勒塔布  
擊賊於下坑歐溪頭追至郭坑三戰皆捷斬首二  
千餘級是年調滿洲正紅旗副都統十九年二月隨  
都統賚塔征海澄率陸路師先衆進勦屢敗賊衆  
遂抵海澄偽總兵蘇堪等降八月

詔撤福建兵以吉勒塔布同副都統沃申駐守漳州二十  
一年隨拉哈達率師旋京二十二年授護軍統領

尋擢正紅旗蒙古都統二十七年授兵部尚書列  
議政大臣時喀爾喀為噶爾丹侵擾以賊逼呼倫  
貝爾汎界來告

上命吉勒塔布同都統巴海等徵兵科爾沁防禦噶爾丹  
尋復

遣往蘇尼特度水草佳處為喀爾喀遊牧地二十九年四  
月同尚書阿喇尼往歸化城北及圖拉等處安設  
臺站復與阿喇尼領兵會喀爾喀諸札薩克兵由

洮瀨河進勦六月偵知噶爾丹刼掠烏珠穆沁至  
烏勒輝河遂分兵二隊乘夜迎戰因喀爾喀兵違  
令亂陣不勝而退部議吉勒塔布輕進失利應革  
職得

旨降四級調用革議政仍留佐領七月率兵駐呼魯固爾  
河

命與內大臣阿密達等會兵偕至克勒侯裕親王福全至  
分軍三隊進剿吉勒塔布領首隊大敗噶爾丹於



烏闡布通三十年三月

詔移喀爾喀土謝圖汗車臣汗歸附人衆於近邊先

遣吉勒塔布同尚書馬齊班第等調至上都河額爾屯河

地候

上駕親臨撫綏七月

上慮巴圖爾額爾克濟農侵掠喀爾喀

諭派鄂爾多斯烏喇特喀爾喀兵各于其地脩禦

遣吉勒塔布統率之偵探聲息便宜行事復授正紅旗滿

洲副都統三十一年巴圖爾額爾克濟農降罷兵  
歸三十五年擢正紅旗滿洲都統明年正月卒

子祭葬如例

覺羅華顯

覺羅華顯滿洲正紅旗人

聖祖仁皇帝康熙十九年由七品旗員授宗人府主事累

遷理事官往權浙江南新關稅務歲滿還京復監  
督張家口稅務三十四年擢翰林院侍講學士充

日講起居注官三十五年

上親征噶爾丹至克魯倫河華顯扈從尋奉使

冊封朝鮮國王李煊子昀為世子歸轉侍讀學士三十九年

三月擢內閣學士五月授甘肅巡撫未蒞任調陝

西巡撫時陝西頻歲歉收開輸粟例華顯疏言報

捐人衆每就近購糴致時價騰涌西安倉貯易盈

積久更虞霉爛若欲增建倉廩又多繁費請不拘

西安甘肅及願在各州縣買交者並許收納又言

褒城扶風武功諸邑自康熙三十六年至三十八年逋賦甚多若新舊魚徵未免拮据請于四十年後分作三年帶徵以寬民力疏皆得

旨俞允四十年擢川陝總督明年二月疏言平涼慶陽臨洮鞏昌四府地皆沙瘠糧少難徵州縣官往往虧帑贖貨請定揀選充補之例

勅令九卿於候補人員內保舉才品端方家道殷實者任之三年俸滿即予遷擢得

旨甘肅所屬被災民甚困苦所奏甚是下部詳議尋

命吏部送員引

見記名遇缺坐補先是蘭州隴西安定諸州縣被災設廠賑粥至是將屆停止華顯以地土寒涼麥收尚俟秋月恐粥廠一停貧民仍復流移他處疏請展俟麥熟後停止復疏言甘肅流民之就賑西安者計數千口臣與撫臣鄂海及司道各員議捐給口糧遞送歸籍但窮民久離鄉井雖歸亦難資生請每

大口給米五斗小口給米三斗其原有地畝之人  
於種麥時給籽種三升無產業者撥與荒地耕種  
即給為業亦照數支給又言甘屬產米者少常平  
倉穀應以麥豆兼收若無米之區即以麥七豆三徵  
收疏皆下部議行四十二年十一月

上幸西安

閱兵以華顯與將軍博霖巡撫鄂海訓練有方並

賚索韃弓矢加一級

賜御書宣猷遠邇及凝清堂匾額尋以有疾

遣太醫診視十二月卒於官遺疏入得

旨華顯自簡任總督以來潔已率屬綏輯地方秦蜀兩省  
事務經理合宜才猷茂著朕西巡時滿漢文武官吏軍  
民無不稱譽其賢忽聞溘逝深為軫悼下所司議贈卹  
加兵部尚書太子太保祭葬如例

命加祭一次謚曰文襄四十四年入祀陝西名宦

欽定八旗通志卷一百六十五



欽定四庫全書

欽定八旗通志卷一百六十六

人物志四十六

大臣傳三十二

滿洲正紅旗三

舒蘭

覺羅石麟明德吳達善三寶武

靈阿 農起

舒蘭

舒蘭滿洲正紅旗人姓納喇父敷多哩官至刑部侍郎兼佐領康熙二十六年二月以審理盜案失實

革侍郎任復以審理革職總督蔡毓榮罪案附  
和尚書希福從輕擬罪由佐領降二級發黑龍江  
効力舒蘭初任理藩院筆帖式三十四年遷主事  
三十八年三月隨侍郎滿丕及都統烏達禪等招  
降巴爾瑚三千餘人安駐察哈爾游牧地編隸佐  
領九月巴爾瑚佐領額克圖叛害察哈爾副總管  
阿必達驍騎校班第掠馬馳以遁

聖祖仁皇帝命喀爾喀公錫卜推哈坦等領蒙古兵追勦

舒蘭率諳察哈爾路徑者四人持檄傳示蒙古諸  
貝勒台吉并派撥察哈爾厄魯特兵隨烏達禪會  
諸蒙古兵剿獲賊渠三十九年遷內閣侍讀四十  
三年四月

命同侍衛拉錫往窮黃河源

諭曰河源雖名古爾班索理瑪勒其實發源之處人跡罕  
到爾等務直窮其源察視河流從何處入雪山邊內凡  
經流諸處宜詳閱之九月還奏臣等於四月初四日就

道五月十三日抵青海十四日至庫庫布拉克有  
貝勒色卜騰扎勒同行六月七日至鄂稜諾爾周二  
百餘里明日西行至扎稜諾爾周三百餘里二諾  
爾相去可三十里許明日至星宿海蒙古名鄂敦  
塔拉星宿海之源小泉萬億厯厯如星衆山環之  
南有山曰古爾班圖勒哈西南有山曰布瑚珠  
勒赫西有山曰巴爾布哈北有山曰阿克塔齊勒  
東北有山曰烏蘭都什蒙古總名曰庫爾坤即崑

崙也山泉出自古爾班圖勒哈者西番名為噶爾瑪塘出自巴爾布哈者名噶爾瑪楚木朗出自阿克塔齊勒者名噶爾瑪沁尼三山之泉溢為三支河即古爾班索里瑪勒也三河東流入札稜諾爾札稜一支入鄂凌諾爾黃河自鄂稜出其他山泉與平地水泉淵淪滌繞不可勝數悉歸黃河東下臣等於六月十一日自星宿海回程舍故道尋河流東南行二日登哈爾吉山見黃河折而東至庫

庫陀羅海山又南繞薩楚克山復北流經巴爾陀  
羅海山之南明日達阿木尼瑪勒占穆遜山其山  
最高雲霧蔽之不可端倪蒙古人言長三百餘里  
有九高峰積冰終古不消常雨雪一月得晴僅三  
四日臣等自此回行又二日至錫喇庫特勒又南  
過僧庫爾高嶺更百餘里至黃河岸見黃河自巴  
爾陀羅海山東北流經歸德堡之北達喀山之南  
兩山峽中流入蘭州自京至星宿海計七千六百

餘里寧夏之西由松山至星宿海天氣漸低地勢  
漸高人氣閉塞故多喘息謹繪圖復

命疏入報

聞是年擢內閣侍讀學士尋

諭大學士九卿等曰朕於古今山川名號雖在邊徼遐荒  
必詳考圖籍廣詢方言務得其正故遣使至崑崙諸處  
目擊詳求載入輿圖即如黃河之源出西塞外庫爾坤  
山之東衆泉渙散不可勝數望之燦如列星蒙古謂之

鄂敦塔拉西番謂之索里瑪勒中華謂之星宿海是為河源匯為北稜鄂稜二澤東南行折北復東行由歸德堡積石關入蘭州其原委可得而縷析也四十四年擢

舒蘭內閣學士明年

命往西藏封拉藏為翊法恭順汗回京得風疾

賜醫診視并

賜藥飲兩閱月始痊四十七年閏三月疾復發乞休

命解任調理五十二年正月病痊補原官三月遇



萬壽慶典復其父敷多哩侍郎原品十一月

命舒蘭兼管光祿寺卿十二月遷工部侍郎明年

諭責舒蘭人甚糊塗事多差錯降三級調用五十九年  
卒年六十有八

覺羅石麟

覺羅石麟滿洲正紅旗人康熙五十年授工部筆  
帖式雍正二年在奏事處行走三年擢員外郎四年  
二月授江寧布政使五月奏上江各州縣向有虧

空銀二十三萬九千四百兩有奇經前撫臣李成龍准前布政使董永芝據各府州公議將上司節禮及官役俸工等銀從雍正二年起按季解藩庫抵補至四年三月已解銀六萬一千三百餘兩乃陞任通政使前布政使博爾多於此項內動用三萬三千七百餘兩自欠京餉一萬七千有奇疏入得

旨博爾多虛懸之項一一秉公查揭甚是似此辜負朕

恩之人豈容絲毫姑寬且爾亦豈便代他人任過耶八月奏言泗州被水

命臣動庫銀二萬兩親往散給臣即馳往料理無絲毫假手胥吏內有被災三四分者雖不蠲免錢糧向有賑粥之例酌減散給又有無田代耕窮民止有草房被水冲倒棲息無所其苦更甚亦照成災例行散賑日自辰至午恐饑民守候捐買餅餌使食得

旨料理甚屬妥協可嘉之至非實心任事何能有此賑過

情形已悉爾其勉之十二月疏言外省虧空等案入官  
田屋例應估變乃遷延日久地乏人耕遂至荒蕪  
屋無人居日漸坍塌甚至州縣屢易其人漫無稽  
查或官役侵收肥已應查田地荒蕪者招佃耕種  
房屋分別賃租收息造冊送部存案民間有願買  
者照時價變估又言江安十府糧道每年收放漕  
糧約四十餘萬與小省藩庫無異請照司庫例每  
年春秋二季分別應存應解登冊報部聽候撥解

糧道例應押運過淮抵通在署日少凡各屬解道  
錢糧及支放糧船行月并修船等項未便概任佐  
雜胥役請添設庫大使一員均下部議行五年六  
月遷山西巡撫十一月奏言大同府大有倉朔平  
府常豐倉所貯糧原備軍需四月准部咨將二倉  
米六萬石發給范毓麟秋後買補還倉現飭催買  
補第大朔二府地連直省今歲來晉販糴者多價  
難平減且有闕民食採買未便急迫查各屬貯倉

穀不下百萬石請先動十五萬石運至二處碾米貯倉以備軍需各屬倉穀請動存公銀陸續補買上是之乾隆元年四月疏言晉省汎鋪墩臺向來建設未

為齊整今擬省南省北及隣界僻路等處添設墩臺七十八座營房六百七十三間汎兵三百三十一名就近撥補其烟墩牌坊如數制造又有應栽塘汎二十二處變價完公兵六十八名撤歸伍七月疏言戶部覆准侍講學士楊椿條奏山西佐雜等官宜

給養廉查教職已按品給全俸藩庫鹽場各官已有  
養廉者毋庸議給所有司府經歷照磨及州判縣丞  
等官每員每年應給養廉銀八十兩吏目巡檢司獄  
驛丞六十兩在耗羨下支其兼署之員因有本任養  
廉向無兼支例但念本任養廉除贍家外僅可充本  
任公用而兼署之任亦有幕賓束脩與應辦公務之  
費請准支養廉一半餘仍扣歸缺官項下充公均得  
議行十二月奏稱蒲州平坦潞澤澤州等營汛廣兵

單撫標原設二營兵數獨少請添蒲州協一百二名  
平坦營八十六名潞澤營一百八十八名澤州營七  
十五名撫標二百二十四名守兵一百名共七百七  
十五名即在裁兵內撥給太原營與撫標左右二營  
同城兵數足敷防守惟守糧過多拔補未免壅滯無  
以鼓勵勤勞今擬改步戰兵百充給撫標左右二營  
又言曩者設額外營官兵時在省城建營房四千間  
衙署十四座今兵汰宜估賣但撫標并太原營本城



兵多租民房而額外營兵又議添撫標請將此營房撥給其備弁房屋仍為公署均從之四年二月奏綏遠城副都統甘國璧條奏撥銀買糧貯歸化城綏遠城托克托城三處

命臣議奏查此三處自移駐官兵招民種地以來生聚日繁需糧益多應如所請但行之貴乎可久此項倉貯既無撥用原額而隨時平糶不盡出陳易新若照原奏貯至二十萬石之多恐致紅朽請動支

藩庫耗羨存公銀在歸化綏遠二城各買貯穀五萬石托克托城十萬石碾運協濟請自乾隆四年始每於秋收前遇稔即買價貴即止其領收平糶出納等事委本處理事同知及協理通判管理仍令朔平府雁平道盤查歲底由布政使考成奏銷得

旨着照所請行五月疏言左都御史陳世倌條奏山東濟南等處及山西潞安以西各府屬久未得雨民

望甚殷宜及時籌備查晉省山多水少不通舟楫  
米糧仰賴外來者無幾但民儉多有蓋藏且上年  
豐收民情甚安倘至下月尚無透雨致成偏災則  
宜請動倉穀按被災輕重定賑多寡又思以工代賑  
實為良法晉省各屬城已估計應修報部者共三  
十四州縣此內有成災處即動項發州縣備料興  
工俾貧民得傭工度日報可五年閏六月丁父憂  
回旗十月授內閣學士六年七月以山西巡撫任

內失察布政使薩哈亮貪黷褫職九月

特授鑲藍旗漢軍副都統先是山西平陽府知府章廷珪有婪贓事石麟曾經保薦至是事發議降五級調用十二年卒

明德

明德滿洲正紅旗人姓輝和雍正十二年由筆帖式補太常寺博士乾隆元年授寺丞二年遷步軍統領衙門員外郎三年調戶部緞疋庫五年遷山

東糧道七年授湖南按察使八年疏言督撫等遇  
刁民糾衆搶刦之案應查明是否地方官激變嚴  
拏究辦以示懲創不得藉此輒劾有司徒長刁風  
防汎弁兵亦宜協力查拏不得推諉觀望

諭曰國家愛養斯民惟恐一夫失所偶遇地方歟收未  
嘗不籌畫接濟而刁頑之民遂乘機搶奪不可不重  
懲以儆乃督撫欲自諱其化導不力禁約無方止將  
州縣推尋別故叅劾而於搶奪案朦混歸結又如汎

弁兵丁類皆觀望不前亦豈設兵衛民本意著各督撫提鎮嚴飭所屬一同實力查拿如推諉即嚴叅議處九年四月巡撫蔣溥劾明德剛愎自用於巴陵縣生員方宣點家被盜一案意存諱飾下部議革職

七月授

盛京禮部郎中九月授山東兗州府知府十二年調濟南府十三年遷山東鹽運使十四年七月

上以川省用兵山西軍務絡繹必得幹練之員任使

命明德調補雁平道九月調甘肅安西道十六年遷湖北按察使十九年擢四川布政使二十年調甘肅布政使隨總督黃廷桂往肅州辦軍務二十一年二月授山西巡撫六月奏言陽曲太原榆次太谷祈縣徐溝清源文水交城興縣等十縣四季徵糧貯太原府理事通判倉即供季吏兵餉例不停緩今該廳已徵之數及從前節次買存米豆足數本年支放現令暫緩俟秋後催徵猶恐下年徵支不

繼仍難緩至秋成查晉省溢額穀共五十餘萬石  
各屬現俱平糶於此項穀價內酌撥買米三千石  
黑豆六千石以備墊支嗣後定於秋收後開徵下年  
供支則兵糈既屬有備輸將亦得從容矣十二月  
奏言新疆派調察哈爾吉林等兵奉

旨將陝西糧運巴里坤山西歸化城糧運陝西接濟竊  
計陝西若動撥榆林延綏等處糧由歸化城存貯  
軍需內運往歸款實屬近便如動撥西安同州等



處糧應於連界之平蒲解澤四府州屬溢額穀內  
撥補較為路近省費二十二年五月奏言太平縣  
史村驛明季因汾水阻隔改設曲沃縣蒙城鎮其  
人夫仍留史村汾河久西徙無碍而一驛夫馬分  
設未便應仍併歸史村驛諸疏俱如所請六月調  
補陝西巡撫十月前任山西布政使蔣洲虧空勒  
派為巡撫塔永寧所劾

上以明德前與蔣洲共事毫無覺察並著革職等因

命尚書劉統勲前往鞫實洲正法明德擬絞

特免明德罪發甘肅交黃廷桂差委二十三年補甘肅

涼莊道二十四年正月授甘肅巡撫二月疏言甘

省辦理軍需錢價甚昂四川銅盛錢多懇

敕該督撥運三十萬串來甘搭放兵餉其餘設廠平賣

市價自平從之四月丁母憂

諭賞銀千兩辦喪先是明德在山西巡撫任濫舉屬員

楊文龍部議降二級調用又湖北按察使任盜案

遲延補官日降三級調用至是

上以其連年承辦軍需尚屬出力

命署甘肅按察使二十五年八月授甘肅布政使十一月復任甘肅巡撫二十六年二月奏言嘉峪關左右邊牆舊係土築年久殘缺新疆遣犯逃越稽查未密請用節省運糧銀萬餘兩修固嗣後遣犯由關逃回將遊擊交部嚴加議處又奏獲巴里坤逃犯卽於該地正法

上俱從之四月疏言各省發遣巴里坤哈密安西三處之犯甚多安西哈密無屯係賞兵為奴現在兵數裁減巴里坤有屯田而糧少遣犯俱難再發應將續到者發開展烏魯木齊屯所二處上年豐收非但有裨屯務即各犯亦可得所又疏言甘省地方遼闊遣犯沿途投宿坊店難以防範應將各驛閒房修二三間為監房並責分防文武官弁稽查疎脫叅處俱如所奏行二十七年五月復調山西巡

撫九月奏歸化城五廳地方除托克托城已設倉  
貯穀外其歸化城和林格爾薩拉齊清水河四通  
判應請每處增設常平倉穀三萬石動用司庫耗  
羨銀買貯又與河東鹽政薩哈岱合疏言夏縣白  
沙河居民舊築堰以護田廬並為城垣保障但土  
工不堅應改石工恐民力難勝請動充公銀七千  
餘兩及修浚姚暹渠存項銀四千兩令運司督州  
縣修固嗣後殘缺除北岸仍聽民修外南岸民少

應歸河東渠堰歲修案內辦理二十八年六月奏  
大同鎮所屬各臺從前因係邊境設兵過重今久  
成內地宜量裁改水泉營地方偏小左有老營右  
有偏關均設大員重兵相距甚近請裁該營遊擊  
並兵百將老營守備移駐管理即隸老營叅將轄  
又裁靈邱路叅將以所屬渾源營都司改補靈邱  
路都司歸北樓營叅將轄靈邱路守備改補渾源  
營守備歸新平路叅將轄俱下部議從之是月調

補江西巡撫十月奏豫章書院公費不敷九江贛  
州兩關平餘銀及各屬城濠地租銀每年共三千  
餘兩除作巡撫衙門書役工食一切辦公賞兵外  
尚餘銀千餘兩請歸書院佐士子膏火得

旨允行十一月復調補陝西巡撫三十年正月調江蘇  
巡撫未蒞任

命署江西巡撫五月奏兇殺多命之案請提至省城承  
審官扣限兩個月速結下部議載入例冊十一月

赴江蘓任三十一年七月奏言江南糧不敷食常  
仰給於楚蜀蘓州一帶商民每閉糴居奇臣屢加  
勸諭不使復蹈前轍各屬辦案疲玩成習督催不  
使堆積佐雜不得擅受民詞私作威福該省襟帶  
江海太湖界連兩省刦盜尤多臣飭屬查拏立破  
多案崇明漁船出洋後輒肆強刦今於口岸增兵  
役嚴察

上嘉其留心時南匯山陽兩縣民有傷父兄致死者承



審官誤照過失殺問擬明德親提駁改奏革原審  
各員職並劾按察使李永書不勝任請交部嚴議  
諭曰向來督撫每於臬司審轉案件往往曲為徇隱若  
明德之秉公持正何患獄獄之不平允吏治之不整  
飭乎明德辦理此事甚屬可嘉賞荷包六個以示優  
獎又奏常熟縣福山塘一河為蘓州等處入海要津  
支港甚多灌民田數萬頃乾隆二十六年濬後迄今  
又淤借撥司庫銀九千七百餘兩乘時再濬於所

灌民田分兩年徵收歸款從之三十三年二月調補雲南巡撫時大兵討緬甸七月與署總督阿里衮合疏言省城至永昌邊界路險運艱請撥藩庫閒款銀三萬兩分段攢修兩月可竣庶軍糈不致遲誤又合疏言各隘口俱設兵如奸民私販出口兵丁得財賣放一并正法失察官弁叅革治罪能拏獲者重賞八月又合疏言永昌普洱沿邊土司以緬匪滋擾田土多荒有乏籽種牛具者請量借

給於明秋交米還項九月又合疏言滇省銅廠三十餘向係糧道專管金銀鉛廠二十九係布政使專管而本地道府無稽查責耳目未周請將各處廠務係州縣管理者責成本府專管道員稽查係廳員管理者責成本道專管統歸布政使總理糧道既不管銅廠事務太簡將驛鹽道所轄之雲南武定二府改歸管理均如所請行三十四年三月擢雲貴總督奏請收養戰馬分派武職大員管理

其棚槽草料等仍令地方官脩支

上嚴飭其推諉却責會副將軍阿里衮奏將領等所用

馬行至南底壩地方即已疲乏

詔責明德漠視軍務漫不經心下部議革職從寬留任

尋

諭曰明德自擢任總督以來辦理諸務皆不及從前實力奮勉於養馬一事尤漫無經理因循誤公豈宜令仍為總督即留滇省亦於公事無益念伊從前在江

藉於地方情形尚屬熟悉著即降補江蘇巡撫時永

昌府知府趙珮以病告歸明德為代請

上以趙珮規避革職自備資斧効力明德遽為代奏交  
部嚴加議處又以明德不能催辦糧餉再下部嚴  
議應革任均得

旨寬免註冊七月經畧大學士傅恒等奏留明德協辦  
軍務俟凱旋後再赴新任尋

命署雲南巡撫專管臺站事十月

諭曰明德辦理軍需糧馬是其專責屢經飭諭始終不能實心出力今經畧大學士傅恒奏十月初一日已抵新街會兵尅期深入而後隊繼進之兵尚未到齊前屢諭明德令其設法催儻官兵迅赴蠻幕何以至今尚未全抵軍營卽所運糧石亦不能源源接濟辦馬一項亦自安於無能希圖置身事外可見其平日專事空言塞責竟成疲玩痼習著革去翎頂加恩仍署雲南巡撫以觀後效三十五年卒

吳達善

吳達善滿洲正紅旗人姓瓜勒佳乾隆元年進士授戶部主事六年遷員外郎十三年遷國子監祭酒十五年六月遷光祿寺卿十二月擢內閣學士十七年授

盛京禮部侍郎尋調刑部十八年調兵部侍郎十九年調工部侍郎兼廂藍旗滿洲副都統二十年五月授甘肅巡撫七月以查辦軍臺無悞軍功加

一級二十一年

諭獎其宣力軍營

賞戴孔雀翎二十二年議叙軍功加一級二十三年六

月疏言軍糧由肅州運至哈密轉運軍營每石需

費十二三兩向來凱旋官兵鹽菜口糧長吏者按

口抵扣少領者按日補給兵丁藉以糶賣製辦衣

履請嗣後酌以二成本色八成折價支給既得隨

時支用亦可稍省運費下部議行七月加太子少



保二十四年正月授陝甘總督四月

命以總督銜管甘肅巡撫事十一月奏言寧夏府屬橫城堡濱河漲塌西南角樓牆垣請於東岸築草壩以禦河流城下堆碎石六十四丈護城垣接修草防風三十餘丈切西岸游嘴俾大溜北行庶可化險為平

詔如所議行十二月調河南巡撫二十六年四月奏改營制四條一延津縣向設千總一隸開封營封印

縣駐衛輝營外委把總一查延津現屬衛輝府封  
邱現屬開封府請撤協防封邱之外委把總回衛  
輝營移原駐延津之開封營千總駐封邱兼防陽  
武縣為專汛歸開封營都司轄移衛輝營千總一  
駐延津為專汛歸衛輝營叅將轄一胙城係新鄉  
縣專汛今延津既撥衛輝營千總移駐巡防請仍  
將胙城外委為協防以延津千總為延胙專汛一  
王祿營駐劉榮澤向設守備一馬步兵百三十應

改歸河北鎮標中軍兼轄改原武汛外委把總為  
王祿營協防同榮澤獲嘉二縣均以王祿營守備  
為專汛歸河北鎮遊擊兼管一盧氏縣汛屬嵩縣  
營守備轄河南府參將兼轄請移嵩縣城守備駐  
伏牛山之孫家店移陝州營協防靈寶縣之外委  
千總一陝州營馬兵三步兵二十二駐盧氏歸陝  
州都司兼轄其嵩縣營原設盧氏汛把總馬步兵  
撥歸孫家店營守備轄下部議行四月調雲貴總

督二十七年二月奏言滇黔各標協營每兵千設  
藤牌兵百督提撫標兵多藤牌兵尚成隊伍至各  
鎮協營兵有分防汛守及護解餉鞘等差藤牌兵  
少又不適用請以七成改烏鎗手三成改弓箭手  
部議從之六月兼署雲南巡撫二十九年六月奏  
言貴州都勻協銅仁協兵馬錢糧向無專司中軍  
請裁都勻協分防獨山州之右營遊擊改設中軍  
都司兼管左營事隨都勻協副將同駐都勻府城

移左營守備駐獨山汛更八寨左營遊擊名右營  
以符營制裁銅仁協駐府城之左營遊擊改設中  
軍都司兼管右營事裁銅仁協副將駐松桃其原  
駐松桃之左營守備應移駐銅仁府城部議從之  
是月調湖廣總督七月兼署湖北巡撫三十一年  
二月調陝甘總督十二月奏言木壘一帶地廣沃  
請將招集戶民編里一里分十甲每里選里長一  
每百戶選渠長鄉約保正各一以資鈐束戶民墾

地請均勻丈撥凡訟獄各案由守備審理命盜案  
守備驗實訊供巴里坤同知審擬招解從之三十  
三年調湖廣總督三十四年十月

命赴貴州同

欽差內閣學士富察善侍郎錢維城等會鞫威寧知州  
劉標虧空銅本並巡撫良卿按察使高積營私骫  
法案得實論罪如律三十五年兼署湖南巡撫三  
十六年四月調陝甘總督時土爾扈特全部歸順

諭賞給羊隻皮衣吳達善辦理妥速議叙加一級十月  
卒

諭曰陝甘總督吳達善久任封疆老成練達近於陝甘  
任內辦理諸務更見周詳妥協茲聞溘逝深為軫惜  
著加恩晉贈太子太保入祀賢良祠應得卹典該部  
察例具奏

賜祭葬如例謚勤毅

### 三寶

三寶滿洲正紅旗人姓伊爾根覺羅乾隆四年繙  
譯進士授中書五年襲世管佐領九年遷內閣侍  
讀十三年隨尚書舒赫德往金川辦理臺務軍功  
加一級十六年授湖北驛鹽道二十一年來京授  
戶部郎中二十三年派往北路軍營經理達什達  
瓦游牧二十四年五月授直隸布政使疏言州縣  
承修工程事竣報銷奉部核減

國帑攸關皆例應追繳之項知府直隸州為親臨上



司例有督催之責請嗣後州縣等官名下有應追核減銀兩該管府州不即嚴催完解者於揭叅州縣遲延之日即將督催不力之府州職名一併開送照督催交代不力例議處其順天府四路同知所轄州縣與知府同亦應責成照例議處至各州縣如陞遷降調事故離任令接任官查明其任內並無未完核減各項出具印結入於交代案內倘混行出結將接任官照不行詳查例議處部議准

行二十六年七月

上巡幸熱河因橋道船夫俱未修整齊備部議降調

命以道員職銜往哈密辦事二十八年十二月回京二

十九年六月授四川布政使七月調湖北三十一

年調湖南三十二年派查雲南一切緊要軍務三

十五年七月調貴州三十六年擢山西巡撫三十

七年九月疏言西安將軍富僧阿具奏西安兵移

駐巴里坤事宜移會各省查山西巡撫向有親丁

步糧四十分經前撫臣諾岷奏請在太原駐防滿洲蒙古餘丁內挑取四十名給與支食以資生計又經前撫臣阿里衮以太原駐防餘丁支食親丁名糧係作為養育兵丁各報部在案惟是八旗駐防挑作督撫親丁體制實為未協應照部咨將駐防餘丁原支山西巡撫親丁隨糧四十分裁汰可否仰懇

聖恩俯念太原駐防生齒繁盛增設養育兵錢糧俾旗

人餘丁得資養贍第查晉省右衛養育兵每名月  
支銀一兩五錢米一石二斗五升今裁隨糧增養  
育若即援數議設未免太優查西安駐防養育錢  
糧每名月支餉銀一兩粟米三斗請仍按原額四  
十分之數增設養育兵四十名每名即照向辦月  
支銀米例遇折色之月給銀三錢錢糧不致加增  
而旗人叨沐

聖主養養之恩於無既矣照所請行三十八年正月調

浙江巡撫七月疏言杭州府屬之海寧縣所轄民  
戶五十餘萬額徵地丁銀六萬五千有奇歲完漕  
米六萬三千零蕪有修防塘工事件實屬疲繁難  
兼三要缺湖州府屬之安吉州所轄民戶止八萬  
四千有餘額徵地丁僅銀一萬六千餘兩歲完漕  
南等米亦止六千五百餘石實屬簡僻中缺請將  
海寧縣陞為州安吉州降為縣又查海寧州城西  
北三十里之長安鎮商貨畢集蕪為嚴緝私鹽竊

匪要地離州稍遠必得專員彈壓請將該州州判  
移駐部議從之四十二年五月擢湖廣總督十月  
諭曰三寶陞任總督已在本年恩詔之後應照巡撫職  
銜請封念其平日辦事尚屬認真著加恩給總督封  
典四十三年十二月疏言查閱營伍情形衡州協副  
將福海年非強壯不能振作但出師金川著有勞  
績若以旗員補用尚能勝任請給咨送部引見又  
沅州協副將洪昌運年力漸衰請勒令休致

諭曰福海洪昌運同係副將俱年力衰頽自應一併勒令休致今三寶以福海身係滿洲請以旗員補用於洪昌運則竟請休致顯係偏護旗員有心軒輊非所以示公允況福海在金川出兵如果勞績懋著自必得受世職該旗必照例辦理非查核軍政之督撫所應議及者也且三寶以滿洲身任總督於闔屬滿漢員弁均宜一視方足以飭營伍而昭勸懲乃於滿漢副將一例兩辦其何以使衆心帖服耶三寶着傳旨

書仍管湖廣總督事三月奏湖北安陸府城外舊  
有富民河一道年久淤塞經署湖北布政使福川  
奏請借項興挑臣覆查此河脩旱潦通舟楫商民  
兩便現當徵旱後貧民得傭工餬口自當遵  
旨速為辦理報

聞是月調浙閩總督四十五年春

上南巡



賜詩曰海疆浙閩重幕府簡猶難必也知大體寧惟期  
小安暴除艱廢猛衆得允於寬節相權資理徐歸黃  
閣端五月疏言浙江海塘老鹽倉一帶柴塘四千二  
百餘丈蒙

聖主親臨閱視諭令改築石塘實為萬年經久之至意  
臣親往覆勘此時正遇大汎現在柴塘實資抵禦  
沿塘各工俱屬穩固惟潮神廟前大盤頭西藏字  
號起柴塘朽腐將盡潮水臨塘殊關緊要現在石

工採料興建尚需時日應將此處趕緊鑲修築塘  
百丈至柴塘四千二百餘丈改建石工自應籌度  
萬全現今柴塘既臨大汛未便更動而退後多係  
田廬臣與司道等面加籌酌似應緊靠柴塘內下  
椿築砌石工以柴塘為外護捍衛更為得力居民  
亦屬相安俟秋汛後擇吉興工又

諭旨指示應修繞海寧城之石塘內有工二十九丈地  
勢較高兩旁魚鱗舊塘原十六層其城東八里文

字號至陳文港密字號百五十餘丈地勢稍低兩旁魚鱗舊塘原十八層今應各照舊層數以期一律築固

諭曰前因浙江海塘改建石工恐該處居民或視柴塘為可廢任意拆毀竊用致損城郭田廬曾明降諭旨令該督撫嚴飭地方文武各官將現有草塘照前加意防護以為重關保障將來石工告竣之時亦可留為外衛此旨尚未據三寶奏到茲據三寶摺內乃稱

與司道等面加籌酌緊靠柴塘之內下椿築砌石工  
既可以柴塘為外衛則捍衛更為得力等語三寶此  
摺與朕降諭旨相符具是否曾經接奉前旨著據實  
覆奏三寶尋奏前因石塘工鉅曾飭該管廳備悉心  
籌畫先據稟稱從柴塘退後數丈建築石工須拆去  
民房八百餘間殊非仰體

聖恩保護田廬至意臣逐一履勘似應於緊靠柴塘內  
築砌石工嗣於五月間恭讀

諭旨杭州老鹽倉一帶改築石塘仍留柴塘以資保障  
臣當即欽遵飭地方文武將柴塘加意保固報

聞六月

命來京入閣辦事八月兼管正藍旗滿洲都統十月充  
經筵講官四十六年正月因王亶望在浙江巡撫任

內聲名狼籍未行叅奏議革職得

旨從寬留任四十七年四月繕寫清字

雲壇祝版糶糊部議革任

詔寬免十一月在

尚書房總師傅上行走四十八年調鑲藍旗漢軍都  
統四十九年五月隨

駕熱河以疾歸六月卒

諭曰大學士三寶歷任督撫宣力有年簡擢綸扉勤慎  
供職方資倚任此次扈從熱河因其遘疾即遣太醫  
診視並令回京調養茲聞溘逝殊為軫恤其任內降  
革處分均予開復所有應得卹典著該部查例具奏

尋

賜祭葬如例謚文敬

武靈阿

武靈阿滿洲正紅旗人姓氏勒佳由前鋒領長於  
乾隆十九年授前鋒校二十三年八月署前鋒章  
京從征準噶爾回部有功給雲騎尉世職三十年  
授直隸居庸路都司三十五年授督標後營遊擊  
三十九年九月山東逆匪王倫擾臨清直隸總督

周元理恐賊竄入境令武靈阿等赴王家淺察探行至塔灣西南距臨清三里遇賊百餘縱火劫掠武靈阿直前奮擊賊驚走翌日官兵屯西岸賊三千餘兩路來犯發鎗礮擊之賊散而復合武靈阿射中偽總兵楊壘左肩兵穆維殪之奏入

諭曰直隸官兵此次堵殺賊匪使其不能西逸將領弁兵俱奮勇出力甚為可嘉武靈阿著交部遇有叅將缺出即行陞補又



諭曰周元理奏遊擊武靈阿射中賊目頗為奮勇著舒  
赫德看其人材如果可用即補授德州城守尉倘不  
能勝任亦即據實具奏是月即奏補德州城守尉十月  
得

旨遊擊武靈阿已奏補德州城守尉但城守營所得官  
項較遊擊轉少是明陞其官而暗減其祿非所以示  
體恤著舒赫德再將武靈阿才具心地與臨清城守  
之德州叅將烏大經秉公比較若烏大經勝於武靈

阿即著烏大經陞補臨清副將其所遺德州叅將員缺令武靈阿陞補俱著舒赫德妥酌具奏旋奏補德州營叅將舒赫德尋以武靈阿明敏勇幹訓練有方請調補撫標中軍叅將

詔如所請四十一年二月

上巡幸山東親涖臨清州舊城詢及官兵剿捕情形

諭內閣曰叅將武靈阿係在事出力之人雖已加恩擢用仍著賞戴花翎示獎十月遷陝西慶陽協副將四

十四年擢甘肅寧夏鎮總兵四十六年六月從剿  
蘭州逆回蘓四十三於華林山四十七年三月署  
陝西固原提督七月回寧夏鎮任四十八年六月  
卒

農起

農起滿洲正紅旗人姓索佳父彰萊官副都統乾  
隆二十五年農起由筆帖式授工部主事累遷員  
外郎中三十四年授湖南驛鹽長寶道三十八年

遷湖南按察使三十九年調任湖北四十年二月  
以湖南任內率轉命案錯誤部議降二級調用

上念其才尚可用五月授山西按察使十月調任安徽  
四十二年遷安徽布政使四十三年鳳陽泗州潁  
州太平和州六安州各屬旱豫省黃河潰隄下注  
亳州蒙城漸及鳳陽泗州所屬州縣

詔撥川米十萬石以賑農起徧至各屬察勘督辦飭屬  
捐設粥廠並奏吏社倉穀煮粥助賑疏入報

聞四十四年以失察天長縣貢生程樹留所刻詩文狂

悖復失察鳳陽縣吏侵蝕賑銀兩經部議革任

詔免四十五年五月調河南布政使八月擢安徽巡撫

四十六年三月

諭曰農起審擬巡檢潘振宗藉端婪索致斃人命一案

僅擬發往伊犁殊為好名輕縱部議革任本屬咎所

應得念其辦理上年賑務於撫卹事宜尚能認真著

加恩從寬免其革任註冊十年無過方准開復四十

七年正月調山西巡撫三月奏言向例大同朔平府屬州縣食口鹽平陽蒲州澤州潞安絳州等屬四十四州縣食河東引鹽太原汾州寧武代州忻州等屬四十四州縣引課歸入地丁就近刮食土鹽聽民販運蒙古鹽入內地接濟乾隆四十五年皇上軫念河東商乏禁販運蒙古鹽積存口外七百餘萬斤致土鹽價昂臣思以蒙古鹽之有餘補內地土鹽之不足於民食生計有益請令地方官給以

印票聽向食土鹽居民赴口外買運下部議行並  
議該省招富戶充商五年輪換一次最易滋弊請  
勅該撫妥籌議奏十月奏覆池鹽陸運成本較重查鹽  
價原視年之豐嗇酌定自前鹽政衆神保以價分  
貴賤易起爭端就彼時賤價奏為定額後鹽畦被  
水商力愈乏前撫臣巴延三是以有招富戶五年  
輪換之請新商不善經營虧折愈多臣訪輿論均  
以鹽課歸地丁為便查池鹽商運民銷法行已久

長商既力不能支短商又形竭蹶揆其受病之由  
實因澆晒工本運費較前倍增而鹽價依舊商運  
拮据民多食淡是病商卽以病民懇

恩俯念河東池鹽為三省民食攸關於定額外每斤量  
加價銀二釐停五年輪換之例選現商殷實者定  
為長商將引地分三等勻配闡分以資調濟廷議  
現增二釐之價試行三年後商力充裕再請酌減  
又奏浚榆次縣涂河棘針渠貫入永康渠灌溉瀕



河地畝疏入報

聞是年晉省秋審冊九卿改擬情實者二十二起部議革任

詔留任四十八年九卿核議晉省秋審招冊改入情實者三十一起

諭令明白回奏尋回奏疏至

諭曰秋讞大典由各省督撫分別情實緩決核准具題其中或稍有出入經九卿核改未有如今年之甚者

至農起經朕降旨詢問令其明白回奏乃竟於朕前  
強為陳辯一似九卿核改各案盡屬非是並稱核之  
連年秋審擬入情實數目適為相準等語此何言耶  
定擬案罪祇論其情罪確當豈有較論上年人數多  
寡之理使必執人數而論設遇案犯較少之年豈竟  
將無罪之人有心羅織以足其數耶農起此奏不是  
尤大著革去翎頂並停止三年巡撫養廉仍留山西  
巡撫之任以觀後効四十九年七月因辦理赴甘肅

勦逆回兵差妥協

詔復翎頂仍准支巡撫養廉十二月入

覲與千叟宴五十年四月副都御史梁敷書山西香差

旋京

召見奏汾州一帶二麥多未種民情艱苦

諭農起據實陳奏農起覆奏現在不致成災

諭曰地方雨水短缺致成偏災於閭閻生計大有關係

農起接奉前旨自應迅速親赴汾州一帶實力查勘

乃竟安坐省城惟以臆度之見一奏塞責朕屢念民  
依無時或釋農起為封疆大吏寧不之知所奏各屬  
得雨止據地方官稟報未必盡皆確實且其中有三  
四寸者不得謂之霑足看來汾州一帶仍未得有透  
雨而該撫遽稱不致成災含混具奏竟屬有心諱飾  
著交部嚴加議處即親往汾州一帶確勘據實奏聞  
尋奏各屬現已得雨二麥可望有收秋糧漸次播  
種無庸先行撫卹現飭藩司往勘前梁敷書奉使

所至係滎河一帶僻處山陬民婦聚集邀賞正值  
青黃不接藉端申訴

諭曰地方旱災民瘼攸關朕宵旰勤求無時或釋凡遇  
奉使回京復命之員召見時無不詢以沿途地方情  
形如有奏及雨澤愆期及民生拮据者卽諭該督撫  
籌辦撫卹卽所奏不實從不肯以為百姓之故加以  
處分蓋朕之意總以民依為重惟恐閭閻艱苦壅於  
上聞農起寧不知之乃接奉前旨僅令藩司前往又

以地方官稟報虛詞支飾陳奏且謂梁敷書因吝惜  
賞賚藉端入奏更不免吹毛求疵豈朕簡用委任之  
本意耶農起由司道用至巡撫並非由人保薦因其  
在藩司任內辦理安徽偏災尚能留心民事經朕特  
加拔擢復由安徽調任山西今該省地方缺雨乃復  
迴護諱飾巧言陳奏殊不類其平日所為業已交部  
議處並令親往確勘即未至成災亦應妥為撫卹或  
借口糧或緩征以資接濟五月農起親往太汾沁遼

隰平等處確勘連得透雨麥秋並未成災惟秋收  
尚早奏請酌糶常平穀借給口糧本年錢糧緩至  
秋後徵收

諭曰平陽蒲州等處麥收既歉著卽賞兩月口糧餘照  
所請速行分別平糶酌借緩徵以資接濟而紓民力  
至晉省迤南各屬雨澤短缺農起從前奏報各摺並  
未剴切陳明本屬含混是以朕未能深悉該省被旱  
實情梁敷書回京奏及節經傳旨將該撫交部嚴加

議處並加恩從寬留任矣今據將查勘實在情形詳  
悉覆奏並稱如果成災該道府州縣七十餘員何盡  
隱匿不報且詢之村庄小民僉稱實未成災倘地方  
官隱匿不報何難至上司衙門呈控等語農起既經  
親往查勘所奏自屬實在情形地方雨水收成朕亦  
不能不以督撫之言為據農起尚不至有心諱飾但  
即該撫所奏平糶緩徵酌借口糧之處何以不早行  
籌辦耶朕屢念民依如傷在抱似此拯救災黎之事



一經督撫奏聞立時降旨俾小民生計有資早霑一日之惠即早得一日之益乃晉省缺雨已久直待朕降旨詢問該撫始親往查勘奏聞辦理以致小民遲霑渥澤此即農起從前含糊具奏之咎封疆大吏當仰體朕懷留心民瘼豈應延緩含混若此即農起已經部議從寬留任此次姑寬之後倘仍有心迴護虛詞支飾將來一經小民告發及籍隸山西之科道等官叅奏查出實情朕必從重治罪不能再為寬貸也

八月卒

諭曰山西巡撫農起自簡任封疆以來辦理地方事宜頗能實心整頓今聞溘逝殊屬可惜所有任內降革處分准其開復應得卹典該部察例具奏尋

賜祭葬如例

欽定八旗通志卷一百六十六